

Date – 11/05/2026

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma'n Health ATM kaltlanga awlsam taka natna hmuhchhuah ani chu lawmawm atih thu sawiin mipuiten tangkai tak an hman ngei a beisei tih a sawi.
2. Sorkar laipuaia Ministry of Panchayati Raj in Deen Dayal Upadhyay Panchayat Satat Vikas, 2025 hnuai lawmman dawngtute a puan ah Kawrthah North Village Council chu 'Clean & Green Panchayat' huangah pakhatna a ni.
3. Prime Minister Narendra Modia chuan nimin khan Hyderabad-a hmasawna hna cheng vaibelchhe 9400 hu a hawng.
4. India leh Trinidad and Tobago chuan inremna chi riat nimin khan an ziak.

<><><>

CM

Chief Minister Pu Lalduhoma'n Health ATM kaltlanga awlsam taka natna hmuhchhuah ani chu lawmawm atih thu sawiin mipuiten tangkai tak an hman ngei a beisei tih a sawi.

Pu Lalduhoma hian kar hmasa khan Lunglei District a tlawhna ah Lunglei DC Navneet Mann in Corporate Social Responsibility (CSR) kaltlanga a hmalakna Health ATM chu tlawhin an hnathawh chu chhuanawm atih thu a sawi a, mipuiten manchawi ngai lova an taksa dinhmun enfiah nana Test an tih thei chu hlu atih thu sawiin tangkai taka an hman ngei a beisei a ni.

Chief Minister chuan Lunglei hmalakna chu Mizoram hmun danga sawrkar damdawiin hrang hrang pawh chhunzawm ve tha atih thu sawiin mipui tamzawkin an chhawr tangkai theih nan tangkai taka hman a duh thu a sawi a ni.

<><><>

HEROIN SEIZED

Inrinni khan Keifang Kualmawia police duty hel tum ruihhlo tawlh, Lalnunchhana kum 33, Bungzung Kawn veng chu man a ni.

Saitual Police hotute hnen atanga thu dawn danin Lalnunchhana hian a rucksack (bag) atangin sabawn bawm 20 a fun, No 4 an man sak a, ruihhlo hi cheng 4,880,000/- man hu vel niin chhut a ni.

Police duty te sawi danin Lalnunchhana hian Zokhawthar atangin heroin hi a rawn keng a, Champhai leh Khawzawl check gate te ke in a rawn hel thla zel a, a kar lak ah motor remchang rawn chuang thla zelin, May 9 (Inrinni) tuk khawvar hma khan Saitual police duty na metre 70 vela hlaa Kualmawi hel tuma a kal lai chu, ramhnuai kawngpui leh kawngpui inkara a torch light eng zeuh an hmuh chu ringhlelin, special team ten zan thim hnuai ah an hual zui a, man a ni ta a ni.



IMFL

Vairengte Police duty te chuan an thudawn bawh zuiin nimin khan Vairengte bul N. Chhimluang khaw dai ah lirthei pakhat atangin Sap Zu leh Beer thahnem tak an man a, an Zu man hi case 154 ani a, Zu phurh nan a an hman Motor hi a Driver a tlan bo avangin Civil witness te hmuh laiin man a ni a, Motor hi Vairengte Police hungchhungah dah a ni.



NATIONWIDE NRP DAY

Nausen piang hlim harsatna nei te nunna chhanna atan leh nausen thi tih tlemna tur atana hmalakna kawnga inzirtirna chu inrinni khan Zoram Medical College & Hospital (ZMCH) a Department of Pediatrics leh Department of Obstetrics & Gynaecology te tangkawp buatsaihin neih a ni.

'Neonatal Resuscitation Program Day' puala hun hman hi ZMC&H Dean, Professor Swati M Patki chuan a hmanpui a. Nausen piang hlim harsatna nei te nunna chhanna atan leh nausen thi tih tlem zelna tur atana hmalakna pakhat niin, Indian Academy of Pediatrics (IAP) leh National Neonatology Forum (NNF) bul tum niin, ram pum huap state 35 leh UT tinah a ruala hman ho tura duan a ni a. Nausen pianghlim harsatna nei te chhanchhuah dan training hrang hrang Nurse leh doctor tam thei ang ber te hnenah pek a ni.

India rama hian nausen piang 10 zelah 1 hi thawk lama harsatna neiin an lo piang thin a, a hun taka buaipui nghal a nih chuan nausen tam tak chhanchhuah an lo ni thin a, he training-ah hian naupang doctor, gynaecologist, medical officer, intern leh nurse thahnem tak hnenah zirtirna pek an ni a, nausen pianghlim harsatna neite chhanchhuah an lo nih zel theih nan leh Mizoram in Infant mortality rate (IMR) hniam a neih zel theih nan a pawimawh hle tih damdawilam thiam te chuan an sawi bawk.



‘CLEAN & GREEN PANCHAYAT’ AWARD

Sorkar laipua Ministry of Panchayati Raj in Deen Dayal Upadhyay Panchayat Satat Vikas, 2025 hnuiaia lawmman dawngtute a puan ah Kawrthah North Village Council chu ‘Clean & Green Panchayat’ huangah pakhatna a ni.

Ministry of Panchayati Raj in lawmman a pekchhuah hi faina kawnga hnathawk tha, ramngaw leh nungcha venhim kawnga thawk tha leh khawtlang hmasawna atana thawk tha te an ni a, Kawrthah North hian an khaw faina bakah ramngaw venhim kawnga hna an thawh that avangin he lawmman hi an dawng a ni.

Deen Dayal Upadhyay Panchayat Satat Vikas Puraskar lawmman hi huang hrang hrangah then niin Mizoram bakah hmarchhak biala khaw dang te pawhin lawmman hi an dawng a, Lawmman dawng panchayat 42 awmin Kawrthah lawmman dawna ‘Clean & Green Panchayat’ hian pawisa fai cheng vbch khat a keng tel a, lawmman hi thla leh June ni 3 hian New Delhi-ah sem a ni dawn a ni.



STAND UP LAWNGTLAI

Lawngtlai khawpuiin kawng hrang hranga hmelthar hmu a, hmasawna nasa zawk a neih theih nana hmalakna kalpui mek, Tho Law Dir Tuah (Stand Up Lawngtlai) hnuiaia hmalakna kaltlangin hmasawna hmuh chhoh mek a ni.

Lawngtlai khua ah hian kawngkama lirthei, zankhuua dah thinte chu, midang tan hnawksak lova dah tir niin veng hrang hranga Village Level Parking Management Committee chuan kawng dala dahte chu Lai Autonomous District Council in chawi tura ruahmanzat pawisa chawitir an ni a, Veng thenkhat chuan an huamchhunga hmun remchang laite zan lama lirthei dahkhawm nan ruahmanin, kawngpui dung pawh hmuh theihin a felfai tan tawh a ni.

Traffic Enforcement Task Force chuan Lirthei lei thar ziahluh a nih dawnin a dahna tur hmun neih ngei a ngaia, dahna tur hmun nilova dah chu dan bawhchhiatna a ni tih an sawi a, lirthei te chu a dahna tur hmun dik taka dah theuh turin a neitute an ngen a ni.



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



SYNOD HOSPITAL

Synod Hospital Durtlang chuan kum 2026 April thla chhung khan Kohhran, mimal, thianho leh pawl hrang hrang atangin Synod Hospital Charity Fund-ah cheng Nuai 8, Sang 7, Zasarih leh sawmpahnih (Rs 8,07,712/-) an dawng.

Synod Hospital Board thutkhawma tarlan danin kumin March thla chhung khan damlo mi 1,534 admit an ni a, naupiang 148 awmin mitthi hi 22 an awm thung a, Hospital OPD, Dr. Fraser's Clinic leh Mobile Clinic-a inentir hi an vaiin mi 8,963 an ni.

Synod Hospital Board thutkhawm hi Rev. John Raldosanga, Synod Moderator-in a kaihruai a, Dr. R.L. Sanghluna, Secretary-in report a pe. Report-ah hian thawktu hrang hrang kaisang leh dah ngheh an awm thu te, Mission for Vision atanga Motor dawn a nih thu te, thawktute leh zirlaite puala retreat neih a nih thu te, Hospital Building thar sak tur chungchang te, sum hmuh leh hmanna endik (Audit) zawh a nih thu te, B.Sc Nursing VI Semester zirlaite Mental Health Posting cum Educational Tour-a CMC Vellore-a an kal thu te tarlan a ni.



TOURIST

Mizoram chuan hriat theih chinah kum 17 chhunga khualzin a ngah ber tum a tawng.

Sorkar chhinchiah danin, kum liamta 2025-26 chhung khan Mizoramah khualzin mi nuai 9, sing 8 leh 518 chhinchhiah an ni a, an zinga nuai 9 sing 6 sang 6 leh 60 hi India mi niin, rampawn mi (foreigner) 14,558 an awm a ni.

Ram pawn atanga rawn zin lut zingah hian Myanmar mi 10,956 awmin an tam ber a, foreign tourist chhinchhiah zat atngin za zela 75.26 an tling. Myanmar mite dawtah hian USA atanga rawn lut an tam ber a, mi 878 niin, foreign tourist chhinchhiah zat atanin zaa 6.03 an ni.

Tourism department hian kum 2023-24 atangin foreign tourist bik hi an ram mal angin a tarlang a; kum 2023-24 khan foreign tourist 3,884 awmin, heng zinga 1,336 hi USA atanga rawn lut niin an tam ber a, Australia atanga rawn lut mi 298 ten an dawt. Kum 2024-25 khan foreign tourist 5,911 chhinchhiah niin, Myanmar atanga rawn lut mi 1,472 leh USA atanga rawn lut 1,222-te chu a tam ber leh a dawttu an ni bawk.

Kum 2023-24 data atanga a lan danin nikum 2025-26 thleng khan Mizorama foreigner rawn zinte zingah hian Myanmar, USA, Australia, UK, Japan leh Israel mite an tam zual a ni.



PM

Prime Minister Narendra Modia chuan nimin khan Hyderabad-a hmasawna hna cheng vaibelchhe 9400 hu a hawng. Heng project te hi state chhunga hmasawna ruhrel tih changtlunna tur hna te an ni a. Thusawiin Pu Modia chuan West Asia buaina avanga khawvel puma energy lama harsatna thleng mekah India chuan tha takin ruahmanna a kalpui a ti a. Mipuite chu tuialhthei leh gas te renchem taka hmang turin a chah a. Rampawn atanga lakluh petrol leh a kaihnawihte ren taka hmang turin a ngen a ni. PM Modia hmasawna ruhrel hawn zingah hian cheng vaibelchhe 1700 senna PM MITRA Park Warangal bakha National Highway -167 Gudebellur leh Mahabubnagar inkar siam turte an tel a ni.



INDIA AND T&T

India leh Trinidad and Tobago chuan inremna chi riat nimin khan an ziaak. Heng thawhdunna tur inremnate hi tourism, healthcare, hmasawna ruhrel leh Ayurveda lamte an ni a. External Affairs minister Dr.S.Jaishankar-an ni hnih chama Caribbean ram a tlawh chhungin heng inremna te hi ziah a ni a.External Affairs Ministry thuchhuah danin Trinidad and Tobago Ministry of Foreign and CARICOM Affairs bulding-a solar dahna turte inremnaah hian a tel a. Nelson Island-a hmasawna ruhrel tihchangtlun te leh University of West Indies-a Indian Chair on Ayurveda dinte pawh a tel a ni.

